

Amirul Aizat, Fong Wei atlet terbaik Melaka 2012

PEMAIN golf, Amirul Aizat Abdul Bahar dan atlet wusyu negara, Chai Fong Wei dinobatkan sebagai Olahragawan dan Olahragawati Melaka 2012.

Kejayaan itu membolehkan mereka menerima hadiah wang tunai RM3,000, piala pusingan dan piala iringan.

Majlis penyampaian anugerah itu disempurnakan Yang Dipertua Negeri, Tun Mohd. Khalil Yaakob yang turut dihadiri Ketua Menteri Melaka, Datuk Seri Idris Haron.

Bagi Amirul Aizat, 20, pelajar Sarjana Muda Komunikasi di Universiti Utara Malaysia (UUM), dia tidak menjangka dianugerahkan sebagai Olahragawati Melaka 2012.

Menurutnya, kejayaan tersebut menyuntik semangatnya untuk mencipta kejayaan lebih cemerlang khususnya di peringkat antarabangsa.

"Ini adalah kemenangan paling manis dalam hidup saya dan memang saya tidak sangka menerima anugerah tertinggi ini," katanya.

Fong Wei, 26, pelajar Ijazah Sarjana Muda Pentadbiran Perniagaan, Universiti Putra Malaysia (UPM) pula berbangga dengan kejayaan tersebut.

Katanya, kejayaan itu meneruskan legasi kakaknya, Chai Fong Ying yang merangkul anugerah tersebut sebanyak dua kali pada 2010 dan 2011.

"Saya benar-benar teruja kejayaan kakak dan kini giliran saya pula meneruskannya," katanya.

Atlet olahraga, Badrul Hisyam Abdul Manap dan gimnas, Tan Ing Yueh ditabalkan Olahragawan Harapan dan Olahragawati Harapan, sekali gus membolehkan mereka menerima hadiah wang tunai RM1,000 berserta piala pusingan.



FONG WEI meneruskan legasi kakaknya, Fong Ying apabila dinobatkan Olahragawati Melaka 2012.